

**Nerisassiat uumasuneersut pillugit pisortat nakkutilliinissaannik  
aaqqissuusinermit aalajangersakkat immikkut ittut pillugit Kalaallit  
Nunaannut nalunaarutip allannguutaanik nalunaarut**

**§ 1**

Nerisassiat uumasuneersut pillugit pisortat nakkutilliinissaannik aaqqissuusinermit aalajangersakkat immikkut ittut pillugit Kalaallit Nunaannut nalunaarut nr. 656, 19. juni 2006-imeersumi tulluuttut allannguutit suliarineqarput:

1. § 3-mi imm. 12-itut aamma 13-itut ilanngunneqarput:

*”Imm. 12. Allagartat akuersissutit matumani nalunaarummi paasineqassaaq uumasunik nakorsaanermit allagartat akuersissutit, uumasunik nakorsaanermit tunngasunik allakkat imaluunniit allakkat allat, tassunga ilaalluni uppersaasatit, uumasunik nakorsaanermit tunngatillugu aamma inuussutissalerinermit inatsisinut tunngatillugu piomasagaataasut, aammalu uumasuneersunik tunisassianut ingerlaqataatinneqartussat.*

*Imm. 13. Allagartamik akuersissummik tunniussisartoq matumani nalunaarummi paasineqassaaq uumasunut nakorsaaneq, imaluunniit inuk alla kinaluunniit, Fødevarestyrelsiminngaanniit imm. 12-imi taaneqarsimasunik allagartanik akuersissutinik tunniussinissaminut piginnaatitsissuteqartoq.”*

2. § 14-imi imm. 5-itut ilanngunneqarpoq:

*”Imm. 5. Ingerlatsiviit allagartat akuersissutit imm. 1-imi aamma 2-mi taaneqartut assilineri sivikinnerpaamik ukiuni marlunni toqqortarissavaat.”*

3. Kapitali 4-p kingorna ilanngunneqassaaq:

”Kapitali 4 a

*Allagartanik akuersissutinik tunniussinermi ingerlatseriaaseq*

**§ 15 a.** Ingerlatsiviit, § 14 naapertorlugu nunanut allanut tuniserusuttut, allagartamik akuersissummik Fødevarestyrelsiminngaanniit akuerisaasimasumik saqqummiussisapput, Fødevareregion Nord-imut (fødevareregionen), allagartamik akuersissummik tunniussinissaq pillugu qinnuteqaammik.

*Imm. 2. Fødevareregionimut nunamut allamut tunisinissamut allagartamik akuersissummik saqqummiussinermi, saqqummiussineq paasineqartarpoq nioqqutissamik immikkoortumik nunamut allamut tunisinissamik akuersissummik qinnuteqaatit, aamma ingerlatsiviup qulakkiissavaa, piomasagaatit paasissutissallu, uppersaasammi allanneqarsimasut, kiisalu EU-mut imaluunniit nunamut pingajuusumut inuussutissanik tunisinermi piomasagaatit allat malinneqarnerisut.*

*Imm. 3. Ingerlatsiviup aammattaq allagartamik akuersissummik saqqummiussinermi ilanngutissavaa nioqqutissap immikkoortukkaap pineqartup nalunaaquttatut allagartaata assilineri eqqortumik nalunaaqutsiisimanermit uppersaasatit.*

*Imm. 4. Ingerlatsivik nassiussigaluarpat inuussutissanik, allagartamut akuersissummumut naapertuutinningsunik, ingerlatsiviup piaartumik fødevareregioni ilisimatissavaa aamma ingerlatsivik nassiussarsisussaaq.*

*Imm. 5.* Fødevareregioni ingerlatsiviminngaanniit piumaffigineqarnermi kingorna allagartap akuersissutip taartissaanik tunniussisinnaavoq. Allagartap akuersissutip taartissaanik tunniussinermi piumasaqaat minnerpaaq tassaavoq:

- 1) Nioqqutissap immikkoortukkaap ataatsimoortuunissaa.
- 2) Ingerlatsivik allakkatigut fødevareregionimut suliami paasissutissanik tamanik nassuiaammik nassiussissasoq, tassunga ilaalluni pequtaasut pillugit paasissutissat, allagartap akuersissutip taartissaanik tunniussisoqarnissaanut kissaateqarnermut.
- 3) Ingerlatsiviup uppersarsaatit pisariaqartut saqqummiutissavai, sumi, qanoq qanorlu sivistigisumik nioqqutissaq immikkoortukkaa nassiunneqarnermi kingorna piffimmiissimanersoq, allagartap akuersissutip tunniunneqarsimasup assilineri aamma paasissutissat allat suliamut naleqquttut.

**§ 15 b.** Ingerlatsiviit nunanut allanut tunisisartut nammineerlutik nakkutilliinermik suliaqassapput piumasaqaatit naleqquttut malinneqarnerannik uppersarsaanermik qulakkeerinissamillu siunertaqartumik, Fødevarestyrelsen EU-mut imaluunniit nunanut pingajuusunut allagartanut akuersissutaani allanneqarsimasunik, fødevareregioniminngaanniit saqqummiunneqartussanik kiisalu nunanut allanut tunisinermut pineqartumut inuussutissalerinermi inatsisini piumasaqaatit naleqquttut.

*Imm. 2.* Nammineerluni nakkutilliinermik ingerlatseriaaseq ingerlatsiviit nammineerlutik nakkutilliinermut najoqqutassiaani allanneqarsimassapput.”

**4.** § 16, *imm. 1, nr 1* ima oqaasertaqarpoq:

”1) § 11, § 12, *imm. 1* imaluunniit 3, § 13, *imm. 1*, § 14, *imm. 1, 2* imaluunniit 5, § 15, *imm. 2*, § 15 a imaluunniit § 15 b unioqqutissisoq.”

**5.** *Ilanngussaq 5, nr. 2* ima oqaasertaqassaaq:

”2) Allagartat akuersissutit ilusilerneqarsimassapput oqaatsit imaluunniit oqaatsit taakku Kalaallit Nunaannut uumasunik aamma uumasuneersunik tunisassiornermut allagartanik akuersissutinik tunniussisarneq pillugu nalunaarummiittut oqaasertarineqartussatut nalunaarutigineqarsimasut malillugit.

**6.** *Ilanngussaq 5-imi nr. 6-itut* ilanngunneqarpoq:

”6) Allagartaq akuersissut tunniunneqassaaq, nassiussap, tassunga attuumassuteqartup, Kalaallit Nunaanni ingerlatsiviup nassiussisup qimannginnerani aamma suli fødevareregionip nioqqutissap immikkoortukkaap taassuma Kalaallit Nunaanni misissornissaanut periarfissaqarnerani. Uiluinnut uumasutigineqanngitsunut allagartamik akuersissummik tunniussinermi utaqqeqqaarneqarsinnaavoq algentoksineqarnermut misissueqqissaarnerit inernerisa nalilerneqarnerat, kisianni tamanna pissaaq EU-mut eqqunneqannginneranni.”

## § 2

Nalunaarut atuutilerpoq ulloq 15. juli 2008.

*Fødevarestyrelsen, ulloq 24. juni 2008*

ANDERS MUNK JENSEN

/Anette Haurum

